

BOSNA I HERCEGOVINA
Konkurencijsko vijeće



BOSNA I HERCEGOVINA
Konkurencijski savjet

RJEŠENJE

**po Zahtjevu za pojedinačno izuzeće sporazuma od zabrane privrednih subjekata Stada
Arzneimittel AG, Republika Njemačka i Opella Healthcare International SAS, Republika
Francuska**

Sarajevo

novembar, 2021. godine

BOSNA I HERCEGOVINA
Konkurencijsko vijeće



BOSNA I HERCEGOVINA
Konkurencijski savjet

Broj: UP-02-26-4-40-12/21
Sarajevo, 22. novembar 2021. godine

Na osnovu člana 25., člana 42., a u vezi sa članom 4. stav (3), i članom 5. Zakona o konkurenciji («Službeni glasnik BiH», broj 48/05, 76/07 i 80/09), u postupku po Zahtjevu za pojedinačno izuzeće sporazuma od zabrane, podnesen od privrednog subjekta Stada Arzneimittel AG, Stadastraße 2-18 61118 Bad Vilbel, Republika Njemačka i Opella Healthcare International SAS, 82 avenue Raspail, 94250 Gentilly, Republika Francuska, dana 15. septembra 2021. godine, pod brojem: UP-02-26-4-40-1/21, zastupani po advokatu Nihadu Sijerčiću, fra Anđela Zvizdovića 1., BC UNTIC, Tower B/II, 71 000 Sarajevo, u smislu člana 5. stav (1) Zakona o konkurenciji, Konkurencijsko vijeće na 96. (devedesetšestoj) sjednici održanoj 22. novembra 2021. godine, je donijelo

R J E Š E N J E

1. Utvrđuje se dopuštenim pojedinačno izuzeće sporazuma od zabrane – Ugovora o ekskluzivnoj distribuciji zaključenog dana 22. jula 2021. godine, između privrednih subjekata Stada Arzneimittel AG, Stadastraße 2-18 61118 Bad Vilbel, Republika Njemačka i Opella Healthcare International SAS, 82 avenue Raspail, 94250 Gentilly, Republika Francuska, u smislu člana 4. stav (3) i člana 5. Zakona o konkurenciji.
2. Pojedinačno izuzeće iz tačke (1) dispozitiva ovog Rješenja, utvrđuje se na vremenski period od 5 (pet) godina i počinje teći od dana 22. jula 2021. godine, zaključenjem Ugovora o ekskluzivnoj distribuciji, u smislu člana 6. stav (5) Zakona o konkurenciji.
3. Obavezuju se privredni subjekti Stada Arzneimittel AG, Stadastraße 2-18 61118 Bad Vilbel, Republika Njemačka i Opella Healthcare International SAS, 82 avenue Raspail, 94250 Gentilly, Republika Francuska, da plate administrativnu taksu u ukupnom iznosu od 2.000,00 KM (dvije hiljade konvertibilnih maraka) u korist Budžeta institucija Bosne i Hercegovine.
4. Ovo Rješenje je konačno i bit će objavljeno u Službenom glasniku Bosne i Hercegovine, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće je dana 15. septembra 2021. godine zaprimilo pod brojem: UP-02-26-4-40-1/21, Zahtjev za pojedinačno izuzeće sporazuma od zabrane podnesen od privrednih subjekata Stada Arzneimittel AG, Stadastraße 2-18 61118 Bad Vilbel, Republika Njemačka (u daljnjem tekstu: STADA) i Opella Healthcare International SAS, 82 avenue Raspail, 94250 Gentilly, Republika Francuska (u daljnjem tekstu: OPELLA) (u daljnjem tekstu skupno za STADA i OPELLA: Podnositelji zahtjeva), zastupani po advokatu Nihadu Sijerčiću, fra Anđela Zvizdovića 1., BC UNTIC, Tower B/II, 71 000 Sarajevo, u smislu člana 4. i 5. Zakona o konkurenciji («Službeni glasnik BiH», br. 48/05, 76/07 i 80/09), (u daljnjem tekstu: Zakon).
Dana 29. septembra 2021. godine, Podnosilac zahtjeva je dopunio zahtjev podneskom broj: UP-02-26-4-40-2/21.

Uvidom u podneseni zahtjev Konkurencijsko vijeće utvrdilo da isti sadrži sve potrebno za dalje postupanje, te da je kompletan i uredan u smislu člana 28. stav (1) Zakona, te je na osnovu člana 28. stav (3) Zakona dana 27. oktobra 2021. godine izdalo Potvrdu o prijemu kompletnog i urednog Zahtjeva, broj: UP-02-26-4-40-3/21.

Konkurencijsko vijeće je na osnovu navoda iz Zahtjeva i dostavljene dokumentacije, ocijenilo da pojedinačno izuzeće sporazuma od zabrane nije moguće utvrditi bez provođenja postupka, te je u skladu sa članom 32. Zakona donijelo Zaključak o pokretanju postupka broj: UP-02-26-4-40-5/21 dana 28. oktobra 2021. godine, koji je istog dana dostavljen podnosiocu, te mu je istovremeno upućen i zahtjev za informacijama broj: UP-02-26-4-40-9/21.

Dana 4. novembra 2021. godine aktom zaprimljenim u Konkurencijsko vijeće pod brojem: UP-02-26-4-40-10/21, Podnosilac zahtjeva je dostavio tražene podatke i informacije, a dana 18. novembra 2021. godine aktom broj: UP-02-26-4-40-11/21 dostavio je podnesak radi ispravke štamparske greške u zahtjevu.

1. Stranke u postupku

Stranke u postupka su privredni subjekti Stada Arzneimittel AG, Stadastraße 2-18 61118 Bad Vilbel, Republika Njemačka i Opella Healthcare International SAS, 82 avenue Raspail, 94250 Gentilly, Republika Francuska.

1.1. Privredni subjekt STADA

Privredni subjekt Stada Arzneimittel AG, Stadastraße 2-18 61118 Bad Vilbel, Republika Njemačka, pripada Stada grupi farmaceutskih kompanija aktivnih u okvirno 120 zemalja. STADA je aktivna u razvoju, proizvodnji, registraciji, prodaji, komercijalizaciji, distribuciji i promociji proizvoda namijenjenih živim organizmima (*eng. life science*) proizvoda kao što su lijekovi, dodaci ishrani, kozmetički proizvodi (i srodne aktivnosti), i drugih medicinskih proizvoda. STADA nudi generičke farmaceutske proizvode uključujući bio-similare, a razvila je raspon brandiranih proizvoda, uključujući lijekove *Grippostad®* i paletu *Ladival®* proizvoda za zaštitu od sunca.

Povezana društva STADA-e u Bosni i Hercegovini su:

- Hemofarm d.o.o. Banja Luka i
- Hemofarm d.o.o. Sarajevo.
- Hemofarm BL i Hemofarm SA su povezana društva drugog zavisnog društva STADA-e, društva Hemofarm a.d. Vršac, Republika Srbija.

Trenutno, STADA se nalazi pod zajedničkom kontrolom investicijskih fondova Bain Capital i Cinven (koji nemaju drugih direktnih ili indirektnih društava u Bosni i Hercegovini).

1.2. Privredni subjekti OPELLA

Privredni subjekt Opella Healthcare International SAS, 82 avenue Raspail, 94250 Gentilly, Republika Francuska je putem indirektnog kapital udjela povezano društvo unutar Sanofi grupacije.

Prema dostavljenom grafiku iz koje je vidljiva organizacijska shema Sanofi grupacije, privredni subjekt Sanofi je matično društvo unutar grupacije, a privredni subjekt OPELLA je u 100% vlasništvu privrednih subjekata unutar grupacije.

Sanofi je javna listirana kompanija, sa sjedištem u Parizu, Francuska, čijim dionicama se trguje na Euronext i Njujorškoj burzi. Sanofi je krajnje matično društvo globalne farmaceutske grupe društava koju čini okvirno 400 povezanih (zavisnih) društava. Sanofi je aktivan u istraživanju, razvoju,

proizvodnji, i prodaji proizvoda zdravstvene zaštite. Organizovan je oko tri glavne oblasti aktivnosti: (i) farmaceutski proizvodi, (ii) vakcine za ljude i medicinski proizvode za široku potrošnju (eng. consumer healthcare). U okviru aktivnosti farmaceutskih proizvoda, Sanofi je specijaliziran u sljedećim terapeutskim oblastima: imunologija, multipla skleroza, neurologija, onkologija, rijetke bolesti, rijetki poremećaji krvi, kardio-vaskularne bolesti, dijabetes, ustaljeni proizvodi na recept, i drugi farmaceutski proizvodi. Sanofijev portfelj proizvoda također uključuje proizvode za čiju kupnju nije potreban recept (eng. *over the counter*) (u daljem tekstu: OTC proizvodi). Sanofijevi proizvodi u okviru cijepiva za ljude posluju u okviru aktivnosti Sanofi Pasteur i fokusiraju se na sljedećih pet oblasti: pedijatrijska cijepiva, cijepivo za influencu, cijepivo za odrasle i adolescente sa pojačanim djelovanjem, cijepivo za meningitis, cijepivo za putovanja i endemska cijepiva. Segment medicinskih proizvoda za široku potrošnju obuhvaća komercijalno poslovanje Sanofia Consumer Healthcare proizvoda, zajedno sa istraživanjem, razvojem i proizvodnim aktivnostima posvećenim ovim proizvodima. Sanofijev segment medicinskih proizvoda za široku potrošnju obuhvaća uspostavljen portfolio sličnih OTC proizvoda za zdravlje i njegu uključujući brandove proizvoda: Allegra, Aspercreme, Cortizone-10, Dulcolax, Gold Bond, IcyHot, Kaopectate, Nasacort, Roloids, Selsun blue, Unisom, Xyzal i Zantac.

Nijedan entitet niti pojedinac nema bilo pojedinačnu bilo zajedničku kontrolu nad Sanofijem jer su dioničari Sanofija veoma disperzirani tako da nijedan od njih nema više od 10% dionica u Sanofiju i stoga ni odlučujući uticaj nad Sanofijem.

U Bosni i Hercegovini, Sanofi ima jedno registrovano zavisno društvo, Sanofi društvo za zastupanje i posredovanje d.o.o. Sarajevo (u daljem tekstu: Sanofi BH), kao i predstavništvo Sanofi Aventis Groupe predstavništvo, Sarajevo. Sanofi plasira proizvode na tržište Bosne i Hercegovine putem raznih distributera na neekskluzivnoj osnovi.

2. Pravni osnov predmetnog postupka – Ugovor o ekskluzivnoj distribuciji

Pravni osnov postupka je Ugovor o ekskluzivnoj distribuciji (u daljem tekstu: Ugovor) zaključen dana 22. jula 2021. godine, između privrednih subjekata STADA Arzneimittel AG, sa sjedištem na adresi Stadastraße 2-18 61118 Bad Vilbel, Njemačka, i Opella Healthcare International SAS, sa sjedištem na adresi 82 avenue Raspail, 94250 Gentilly, Francuska.

Na osnovu zaključenog Ugovora o ekskluzivnoj distribuciji Sanofi postavlja STADU za svog ekskluzivnog distributera za uvoz i prodaju Sanofijevih proizvoda, na tržištima u Albaniji, Bosni i Hercegovini, Bugarskoj, Hrvatskoj, Danskoj, Estoniji, Finskoj, Islandu, Irskoj, Kosovu, Latviji, Litvi, Malti, Crnoj Gori, Sjevernoj Makedoniji, Norveškoj, Srbiji, Sloveniji, Švedskoj i Nizozemskoj, kao i za obavljanje određenih pratećih aktivnosti u pogledu distribucije.

STADA će, kao distributer, distribuirati proizvode, bilo sama ili preko svojih povezanih društava, bilo preko drugih pod-distributera. Cilj Ugovora je strateška komercijalna odluka Sanofija da napusti direktno prisustvo u distribuciji proizvoda sklapanjem partnerstva sa Stodom koja će nastaviti distribuirati Proizvode kao ekskluzivni distributer.

Proizvodi se sastoje od okvirno 50 medicinskih proizvoda široke potrošnje koje trenutno prodaje Sanofi u okviru teritorija za koji je potpisan ugovor. Proizvodi uključuju brandove kao što su Allegra, Bisolvon, Dulcolax i Essentiale Forte N u terapeutskim kategorijama kao što su alergija, kašalj i prehlada, dermatologija i digestivno zdravlje, kao i lijekovi protiv bolova, vitamini, minerali i suplementi.

Ugovor sadrži suspenzornu odredbu koja se tiče distribucije proizvoda, za koje se prema primjenjivom pravu zahtijeva dobivanje pojedinačnog izuzeća od zabrane od konkurencijskih tijela.

Po Ugovoru, Proizvodi koji podliježu izuzeću su **Buscopan, Dulcolax i Allegra**. Ekskluzivna distribucija Proizvoda predviđeno je da započne u novembru 2021. godine, pod uslovom da se

pojedinačno izuzeće dobije za proizvode koji podliježu izuzeću u Srbiji, Crnoj Gori i Bosni i Hercegovini.

3. Relevantno tržište

Kako bi utvrdilo je su li ispunjeni uslovi za pojedinačno izuzeće, Konkurencijsko vijeće je prilikom ocjene predmetnog ugovora utvrdilo relevantno tržište proizvoda/usluga i relevantno geografsko tržište u skladu sa članom 3. Zakona, te odredbama Odluke o utvrđivanju relevantnog tržišta.

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne osobine, kvalitet, uobičajenu namjenu, način upotrebe, uvjete prodaje i cijene.

Uzimajući u obzir prirodu specifičnih proizvoda koji su uključeni u ugovor i predmet samog ugovora, kao i činjenicu da proizvodi koji podliježu izuzeću proizvedeni i distribuirani u Bosni i Hercegovini (Buscopan, Dulcolax i Allegra) pripadaju ATC 3 klasama, Konkurencijsko vijeće je kao relevantno tržište odredilo tržište proizvodnje i veleprodaje gotovih farmaceutskih proizvoda u okviru ATC 3 klasa A03B, A06A, i R06A.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili značajan dio teritorije Bosne i Hercegovine na kojoj privredni subjekt djeluje u prodaji i/ili kupnji relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Obzirom da se Ugovor odnosi na cjelokupnu teritoriju Bosne i Hercegovine, Konkurencijsko vijeće je kao relevantno geografsko tržište u predmetnom postupku utvrdilo teritoriju Bosne i Hercegovine.

Konkurencijsko vijeće je u skladu sa navedenom, utvrdilo da je relevantno tržište predmetnog postupka, *tržište proizvodnje i veleprodaje gotovih farmaceutskih proizvoda u okviru ATC 3 klasa A03B, A06A, i R06A na teritoriji Bosne i Hercegovine.*

4. Analiza relevantnog tržišta

U dostavljenom Zahtjevu, za potrebe ocjene dokaza Podnosilac zahtjeva je dostavio i popis i procjenu tržišnih udjela glavnih konkurenata na relevantnom tržištu, na relevantnomtržištu na kojem se odražavaju efekti sporazuma, prikazano u Tabeli 1.

Tabela 1.

A03B	
	2020
Hemofarm	(**) ¹
Sanofi	(**)
Sopharma (i.v. or i.m.)	(**)

¹ Podaci predstavljaju poslovnu tajnu, u smislu člana 38. Zakona o konkurenciji.

Bioindustria (i.v. or i.m.)	(**)
A06A	
	2020
Hemofarm	(**)
Sanofi	(**)
Farmavita	(**)
Pharmaswiss	(**)
Oktal Pharma	(**)
Mylan	(**)
Pliva	(**)
JGL	(**)
R06A	
	2020
Hemofarm	(**)
Sanofi	(**)
Sandoz	(**)
Bosnalijek	(**)
Berlin-chemie	(**)
Nobelfarma	(**)
Pliva	(**)
JGL	(**)
Medis	(**)
Krka	(**)
Glaxosmithkline ch	(**)
Galenika	(**)
Farmavita	(**)
Amsal	(**)
Replekpharm	(**)
Belupo	(**)
Unifarm	(**)
Zada	(**)

Izvor: Zahtjev

Iz dostavljenih podataka vidljivo je da je sa razvojem generičkih alternativa i kontinuiranog napretka istraživanja i razvoja, tržište proizvodnje i veleprodaje lijekova u okviru ATC 3 klasa (A03B, A06A i R06A) je konkurentno tržište.

Struktura tržišta u okviru relevantnih ATC 3 klasa je kompleksna i specifična i zavisi od terapijske grupe, režima određenog lijeka (da li je na recept ili OTC), kao i od prava intelektualnog vlasništva i postojanja generičkih alternativa za brandirane proizvode.

Neki lijekovi imaju generičke zamjene uključujući jeftinije zamjene, što omogućuje konkurentnost, dok su ostala tržišta koncentrirana zbog prava intelektualnog vlasništva nosioca patenta.

Lijekovi **Buscopan, Dulcolax i Allegra** su generički lijekovi koji imaju mnoštvo generičkih supstituta, te radi istraživačkih i razvojnih aktivnosti koje se odvijaju u inozemstvu postoje i mnogi lijekovi i tretmani koje nisu još uvijek dostupni u Bosni i Hercegovini, ali koji potencijalno mogu ući na relevantno tržište i da postanu konkurenti na relevantnoj ATC 3 klasi.

Stoga, i ako Sanofi u okviru A03B klase ima visoki tržišni udio, tržište nije zatvoreno, te isti ne posjeduju bilo kakva specijalna prava.

Buscopan je spazmolitik, generički proizvod koji se izdaje samo na recept koji ima adekvatne supstitute među mnogim spazmoliticima koji se izdaju na recept (na primjer Spasmex koji prodaje Novartis).

5. Utvrđeno činjenično stanje i ocjena dokaza

U skladu sa članom 4. stav (1) Zakona, zabranjeni su sporazumi, ugovori, pojedine odredbe sporazuma ili ugovora, zajednička djelovanja, izričiti i prešutni dogovori privrednih subjekata, kao i odluke i drugi akti privrednih subjekata koji za cilj i posljedicu imaju sprječavanje, ograničavanje ili narušavanje tržišne konkurencije na relevantnom tržištu, a koji se odnose na direktno ili indirektno utvrđivanje kupovnih i prodajnih cijena ili bilo kojih drugih trgovačkih uslova, ograničavanje i kontrolu proizvodnje, tržišta, tehničkog razvoja ili ulaganja, podjelu tržišta ili izvora snabdijevanja, primjenu različitih uslova za identične transakcije sa drugim privrednim subjektima, dovodeći ih u nepovoljan položaj u odnosu na konkurenciju, zaključivanje takvih sporazuma kojima se druga strana uslovljava da prihvati dodatne obaveze koje po svojoj prirodi ili običajima u trgovini nisu u vezi sa predmetom sporazuma.

U smislu člana 4. stav (3) Zakona, predmetni sporazumi nisu zabranjeni ako doprinose unapređenju proizvodnje ili distribucije robe i/ili usluga unutar Bosne i Hercegovine, ili promociji ekonomskog razvoja i tehničkog razvoja, pri čemu potrošačima omogućavaju pravičan udio koristi koja iz njih proizilazi, a koji nameću samo ograničenja nužna za postizanje ciljeva i ne omogućavaju isključivanje konkurencije u bitnom dijelu predmetnih proizvoda ili usluga.

U skladu sa članom 5. stav (1) Zakona, Konkurencijsko vijeće, na zahtjev jedne ili više stranaka u sporazumu/ugovoru može donijeti rješenje o pojedinačnom izuzeću od zabrane sporazuma, iz člana 4. stav (1) Zakona, ako sporazum/ugovor ispunjava uslove, iz člana 4. stav (3) Zakona.

Analizom dostavljenog Ugovora, Konkurencijsko vijeće je utvrdilo da isti sadrži odredbe koje ograničavaju tržišnu konkurenciju, u smislu članka 4. stav (1) Zakona, te da istovremeno isti ispunjava i uslove iz člana 4 stav (3) Zakona, a sve iz slijedećih razloga:

Odredbe o ekskluzivnosti predstavljaju sastavni dio Ugovora, i kao takve su povezane i potrebne za ostvarivanje ciljeva ugovora.

Kao razlog zaključivanja Ugovora, predstavlja poslovni plan Sanofija je da se komercijalno posveti drugim tržištima, ali istovremeno da ostane u Bosni i Hercegovini sa portfolijom svojih proizvoda na troškovno i vremenski opravdan način, partnerstvo sa lokalno prepoznatim tržišnim igračem kao što je STADA i to na ekskluzivnoj osnovi.

Odredbom člana 11.2 Ugovora predviđen je suspenzorni efekt ekskluzivnih odredbi koje se odnose na proizvode koji podliježu izuzeću dok se ne dobiju odluke tijela za zaštitu konkurencije, o pojedinačnom izuzeću. Ekskluzivitet predstavlja kompenzaciju za STAD-ino angažiranje u promociji Sanofijevih Proizvoda, te činjenicu da Sanofi više neće biti samostalno prisutan na bh. tržištu.

Prema članu 3.5 Ugovora, Stada kao distributer neće tokom trajanja Ugovora (i osigurati će da niko od njenih povezanih društava neće):

- direktno registrovati, prodavati, proizvoditi, snabdijevati, promovisati prodaju ili na drugi način se ponašati u pogledu prodaje ili snabdijevanja Proizvoda bilo kojoj osobi izvan teritorije koji Ugovor obuhvaća;
- aktivno tražiti kupce za Proizvode izvan teritorije koji Ugovor obuhvaća; ili
- osnivati bilo koji ogranak ili održavati bilo kakav distributivni centar za prodaju Proizvoda izvan teritorije koji Ugovor obuhvaća.

Kao razlog ove odredbe o zabrani konkuriranja koja je primjenjiva samo za distribuciju proizvoda izvan teritorije, je da ista služi ukupnom cilju Ugovora, tj. komercijalna održivost Ugovora bila bi ugrožena ukoliko bi Hemofarm komercijalizirao konkurentne proizvode izvan teritorije na kojoj se ugovor primjenjuje, tokom trajanja Ugovora.

Ugovor omogućava lansiranje inovativnih proizvoda Sanofija u budućnosti na tržište koristeći resurse postojećeg učesnika dobro ustanovljenog na tržištu, značajno umanjujući vremenske troškove i donoseći značajne efikasnosti.

Potencijalni negativni efekti na tržištu bi mogli predstavljati činjenica da ekskluzivni distributer predstavlja „ulaznu tačku“ za proizvode Sanofija u Bosni i Hercegovini, a koji će koji dalje prodavati maloprodaji i veleprodaji, kao i činjenica da se Ugovor kvalificira kao Ugovor o ekskluzivnoj distribuciji, te da je sa ekskluzivnom distribucijom moguće smanjenje intra-brand konkurencije Sanofijevih Proizvoda.

Međutim, obzirom da postoji mnoštvo generičkih supstituta za proizvode za koje je podnesen zahtjev za pojedinačno izuzeće, ne znači da Ugovor ograničava dio relevantnog tržišta.

S obzirom da će Sanofi napustiti svoje direktno prisustvo u Bosni i Hercegovini, konkurentski uslovi na relevantnom tržištu ostat će isti (Hemofarm će biti u mogućnosti da distribuira proizvode efikasnije nego Sanofi prije Ugovora) dok će Sanofi sačuvati značajne logističke, marketinške i distributivne troškove tako što će ekskluzivno poslovati sa STADA-om.

Stoga, svi potencijalni restriktivni efekti koji proizlaze iz Ugovora su ublaženi, te Ugovor ne ograničava konkurenciju osim u obimu koji je neophodan za ostvarenje svrhe Ugovora.

S druge strane, ekonomska korist kao posljedica primjene ugovora je činjenica da će cjelokupan portfolio Sanofijevih Proizvoda i dalje biti dostupan kupcima u Bosni i Hercegovini.

Dajući STADI ekskluzivitet u distribuciji, Sanofi će posvetiti resurse u istraživanje i razvoj najnaprednijih tehnologija u novim inovativnim proizvodima, te sačuvati operativne troškove u svakodnevnom poslovanju i neće snositi regulatorne, komercijalne i tehničke troškove za komercijalizaciju. Istovremeno, Hemofarm ima značajno lokalno prisustvo i iskustvo u distribuciji lijekova koje će omogućiti fokusiranu, ujednačenu i distribuciju Proizvoda.

Primjenom Ugovora ne očekuju se bilo pozitivni bilo negativni efekti na cijene proizvoda.

Konkurencijsko vijeće je na osnovu svih dostavljenih dokaza, ocijenilo da, iako predmetni Ugovor sadrži odredbe iz zabranjenih sporazuma (iz člana 4. stav (1) Zakona), da je Podnosilac zahtjeva u dovoljnoj mjeri argumentovao i dokazao ispunjenost Zakonom propisanih uslova za pojedinačno izuzeće predmetnog restriktivnog Ugovora od zabrane, budući da će isti doprinijeti unaprijeđenju proizvodnje ili distribucije roba i/ili usluga u Bosni i Hercegovini, promociju tehničkog i ekonomskog razvoja, pri čemu će potrošačima omogućiti pravičan udjel koristi koja iz njih proizilazi, jer se zaključivanjem i provođenjem predmetnih Ugovora nameću samo ograničenja nužna za postizanje ciljeva i ne isključuju konkurencije u bitnom dijelu predmetnih proizvoda i/ili usluga, u smislu člana 4. stav (3) Zakona, pa je slijedom toga Konkurencijsko vijeće je odlučilo kako u tački 1. ovog Rješenja.

Budući da je članom 6. stav (2) Zakona utvrđeno da pojedinačno izuzeće ne može trajati duže od pet godina, a stavom (5) istog člana da pojedinačno izuzeće važi od dana zaključivanja sporazuma, a kada sadrži uslove i zabrane važi od dana donošenja, odnosno najkasnije od ispunjenja uslova, a kako je predmetni Ugovor potpisan dana 22. jula 2021. godine, Konkurencijsko vijeće je odlučilo kako u tački 2. ovog Rješenja.

Na osnovu navedenog, Konkurencijsko vijeće je odlučilo kao u dispozitivu ovog Rješenja.

6. Administrativna taksa

Podnosilac zahtjeva na ovo Rješenje, u skladu sa odredbom člana 2. stav (1) tarifni broj 107. tačka a) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) je dužan platiti administrativnu taksu u iznosu od 2.000,00 KM u korist Budžeta institucija Bosne i Hercegovine.

7. Pouka o pravnom lijeku

Protiv ovog Rješenja nije dopuštena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Rješenja.

Predsjednik

Dr. sc. Amir Karalić

Dostaviti:

- Podnosiocu zahtjeva, i
- u spis;